



## INATSISARTUNI

Partii Inuit  
Randi Broberg

UPA 2014/189-1  
22.5.2014

**PILLUGU: Isorliunerusuni nunaqarfinni nioqqutissatigut, kiffartuussinermi akitigut, aammalu pilersorneqarnikkut akitigut, qanoq oqinnerusumik naapertuunnerusumillu ineriartortitsisoqarsinnaanera pillugu Inatsisartut oqallinnissannik siunnersuut.**

(Inatsisartunut ilaasortat Knud Kristiansen og Gerhardt Petersen)

Partii Inuit siunnersuummik paasinninnerput malillugu ujjartorneqartoq tassaavoq, inoqarfiit isorliunerusut kiffartuunneqarnermikkut qanoq atugassaqaqtitaanerisa qulaajaavigineqarnissaa. Tassani isorliunerusuni nioqqutissat akii, ataatsimut isigaluguttaaq isorliunerusuni innuttaasut kiffartuunneqarnerat, qulaajaanermi sammivigineqartussatut eqqarsaatigineqarlutik.

Partii Inuit siunnersuummi apeqqutit pineqartut ilisimasaqarfiginerussallugit soqutigaarput pisariaqartillugulu.

Oqaaseqaatitsinnut ilanngullugu Partii Inuit eqqaangitsoorusunnigilarput, inoqarfiit isorliunerusut eqqarsaatigalugit, inuiaqatigiittut qanoq sukaterinerput assut apeqqutaqaataammat – inoqarfinni isorliunerusuni atugassarititaasut eqqarsaatigalugit.

Partii Inuit isumarput naapertorlugu, pisortatigoortumik inoqarfiit isorliunerusut ipisikkiartuaarneqarnissaat pisortatigoortumik aallarnerneqarpoq, taamani 90'ikkut naajartorerini nunap immikkoortuini ingerlatseqatigiiffiit aningaasalersorneqarnerat allanngortinneqarmat, naalakkersuinnikkullu soqutigisaqatigiinniit tamanit akuersissutigineqarmat.

Aningaasalersueriaatsip nutaap eqqunneqarsimasutut taaneqartup ilisarnaatigaa, ingerlatsinermut aningaasaliissutit qanoq amerlatiginissaannut aaliangiisunnngortinneqarmat, sumiiffinni assigiinngitsuni pisortat sullissiviinik atuisut qassiuneri.

Allatut oqaatigalugu, inoqarfiit isorliunerusut sukkatsikkaluttuinnartumik inuerukkiartornissaat tassuunakkut aqquutissiuunneqarnikuuvoq suli ulloq mannamut atuuttumik.

Partii Inuit neriutigaarput, inuiaqatigiittut assigiinngitsutigut sukaterinitta, inoqarfinnut isorliunerusunut sunniutaat qulaajaanermi aamma tikinneqarumaartut.

Minnerunngitsumillu inoqarfiit isorliunerusut pisuussutitsinnik qanoq sutigullu naleqalersitsisinnaanerisa tikinneqarnissaat avaqqunneqarsinnaanngitsutut isigalutigu.